

咁樣算唔算師生戀

作者: Witty Fool 傅蘊羚

Powered by [紙言](#)

我地點認識

中學畢業已經3年 我都K都認識咗6, 7年喇
一直我都覺得我地嘅關係好微妙 師生又唔完全係
朋友? 又好似唔止呢種關係
兄妹? 我仲係15歲果陣佢都仲會開到口當正我係妹咁嘅
但畢咗業之後 就算我地比以前更啱傾 佢死口都唔再認佢當我係細妹

要講到我同K嘅關係, 就要講番我中三果年嘅暑假
中學考完試 通常6月都有試後活動 咁我自己本身好中意地理科
所以只要係同地理相關嘅野 我都會join
咁啱K就係我地學校來咗一年嘅老師 當時佢24歲
佢都係教初中地理嘅 但就冇教中我果班
但係如果有field trip佢都會同miss一齊帶我地去

K唔算高大靚仔 比起同齡嘅小鮮肉 佢嘅外表同高度都只係中等程度
但一直都聽聞好多女同學都成日講佢 男學生就麻麻地佢咁啦
而我當時只係隔離班一個女同學 果陣又中意咗個同班男同學
咁阿sir有幾咁正 有幾咁受歡迎其實我都唔係好理

講番去試後活動 咁2012年嘅6月
地理科有個活動去米埔 咁我就去咗啦
我熟嘅朋友又冇去到 得一個叫做ok熟 又會一齊打波嘅女同學W一齊去
咁我就緊係跟實佢啦
而K就係W嘅地理科老師 所以佢地比較熟
詳細嘅野我唔記得喇 話晒都咁多年前
總之果日個天有雲 但都有陽光 所以個個都有擔遮
咁我就一個人單丁咗出來 自己擔遮 因為W有自己個friend
咁K呢個時候就類似話呢種天陰陰嘅太陽 比起猛烈嘅太陽
會晒到我地更黑之類 我到而家都唔知堅定流

咁佢好似冇遮之類 但佢同我唔熟又冇行埋來我把遮度
直至W叫佢去我度一齊擔
老實講 果陣覺得佢都一表人材
可能果個年紀 覺得啲"哥哥"正掛
但果刻又冇咩特別好感 但依家諗起
我記得我果陣完咗個活動之後有想text下佢之類
但內容唔記得喇
總之我地就係咁認識咗對方
但係我地係點樣熟咗? 咁就要睇下一篇, 唔想打咁長

我地點熟

自從果個活動之後 我就唔知點解開始留意下佢Facebook之類
咁中三果排我玩緊結他 學緊作曲嘅
我可能果陣係Fb問過有冇人想填下詞啦
佢所以佢就inbox我喇
咁我地嘅對話就係因為作曲填詞開始

佢果排好似失戀咗冇耐 (後尾佢同我講番)
就算佢唔講 我見佢填啲詞都知啦
就係咁我地就開始傾下計
後尾佢仲問我拎電話, 咁我地就多數whatsapp傾計

我地果陣咩都傾 字裡行間 我覺得都有flirt嘅成分
但我果陣始終覺得, 佢係學校嘅老師
咁樣係唔啱, 咁反正又暑假, 咁都唔會點見啦

果陣番下parttime, 又去下交流團
咁咪識下啲同齡嘅男孩, 搵下第二個男仔分下心
之前講到我中意咗個同班嘅男仔, 但後尾發現佢心有所屬咁就算咗

咁我果陣都知就算自己對K有啲好感
都冇可能架啦 咁果陣都係開始有啲中意佢姐
要放低唔難㗎 話唔定K都只不過係剛失戀
若有所失, 搵人攝下姐

咁所以我係7月一個交流團識咗個男仔叫做B
識咗冇耐就一齊咗 叫做拍拖 但實情只係出過兩次街之後就分咗

咁暑假K就約我單獨出來食飯 我feel到佢有意
但我知咁樣係唔得 所以叫埋佢個學生, 我個best friend, L 一齊出來食
我果陣都有問準佢 佢話好我先叫埋的

咁我同B拍拖拍咗兩個月就散了 咁K就同我一齊作咗首歌, 填咗啲詞
但我兩年前拎番起呢啲歌詞 諗番起我同K嘅呢啲野
我唔知發咩神經掉晒自己啲作品 連埋所有同佢有關嘅日記都掉晒
可能我諗住咁樣可以令到我忘記佢掛

就係因為咁 我同佢又再填詞 我同K又密密Message
如果我冇記錯 果陣早晨, goodnight加心心emoji都係基本
佢有段日子會send錫錫符號比我添
依家我地表面上都當大家係普通朋友 所以每當我諗番起呢啲野
再諗番起大家依家嘅表現 心諗 K 你係咪真係唔記得以前嘅野?

同B散咗嘅時候係中四開學冇耐
我同佢又勁多message, 偷偷話你地知 我果陣set咗佢生日做我手機password

我覺得自己有中意佢 但都係果句, 根本冇可能
所以果陣班上有個男仔成日撩我 我都對佢有少少好感
但實不相瞞 每個夜晚 果陣我都有掛住K架

可能因為大家都知冇可能 所以都以兄妹相稱就算
佢每次去親旅行都買野送比我
佢果陣送比我嘅果隻紫色嘅俄羅斯娃娃同荷蘭小木屐我都有好好收埋
我到依家都有好好收埋

有次佢去英國 仲話比我知佢趕飛機都買咗個格林威治天文台嘅pizzle
係背後寫咗好多野比我 (我唔記得寫咩喇) 之後趕住都寄比我
咁16歲嘅我知有人對我咁好 咁關心
會錯意又好咩都好啦 少少心動都好正常姐下嘛

咁我見佢咁好 又成日話冇咩住家野食
咁年年新年我都整好西
咁果年我好似係送咗個我整嘅蘿白糕比佢
之後我都好似冇咩點送過啲咩比佢
吖~敬師日我好似有寫卡比佢架

我同佢好似係熟 但咩事令到我覺得曖昧呢?
就要睇下一篇.

我覺得好曖昧嘅原因

暑假佢諗住約我單獨見面 結果我為咗避嫌 帶埋L一齊去
後來中四有一齊佢特登留係學校做野 等到我練完波
之後同我去食飯 真係去到山長水遠
果陣認得食完飯之後佢特登帶我去搭巴士
又等車又盛 等到真係唔耐煩
過咗幾年都我大個啲 先發現當日佢帶我搭巴士根本就係行遠咗
食飯果度行過少少就有輕鐵... 過幾個站就到西鐵...

果段中四嘅日子 總之我地就成日message啦
後來學校有個camp, 佢都有份帶我地去
咁我地8個女仔住一間房, 長洲啲宿舍真係間間都鬼屋咁款
去程果陣 K又突登同我地玩咩揭尾故 嚇我地
所以啲女仔都we wa鬼叫.....
咁我就心裡面自己好驚咁啦.....

果次係我第一次feel到我個好朋友L狂flirt K
我最憎人唔分莊閒 其實可能係呷醋
明明係我同K熟啲 你痴到咁埋做咩
但我又唔係K邊個 可以點? hahaha

咁因為我地8個人一間房 但得一個廁所有排等
(咁諗到咁污穢 我冇去佢間房沖涼)
所以miss定唔知邊個就話可以用阿sir間房個廁所
咁果陣就局住叫個tb去沖啦好似方便啲

但佢都始終係女仔, 都想搵多個人陪
咁佢地就話我同阿sir熟啲, 叫我落去佢間房坐, 叫做陪tb落去沖涼
大家咁擔心, 其實係咪應該擔心我先係呢?
姐係TB係入面沖涼, 真係果啲教畜嘅話 對我做咩都得啦頂
我地真係醒到一個點....

我地係二樓落到樓下, 頂, 呢個宿舍真係鬼屋都不如
一開門就頂住兩張單人床... 間房細到兩張單係床根本就係貼埋一齊咁濟
其中一個單人床仲要攔住廁所個門口 所以入廁所要爬入去嘅....
最慘係, 廁所門關唔實.....

Anyway, 咁TB入咗去沖涼, 我就坐係度打機....係度玩Candy crush.
佢中意就講下野咁, 都係覺下旅行啲野
我唔記得我地有冇互flirt, 但我淨係記得有個位我地傾下傾下
佢摸咗我大牌一下, 咁我就著咗長褲啦, 因為冬天
但果度都係大牌....
所以我就講住笑咁 咁佢做咩 叫佢咪亂摸先得架

就係因為果啲錫錫符號+呢一摸....我覺得成件事好曖昧

但同時又覺得成件事好錯...
咁所以我就嘗試疏遠佢喇....

就係咁, 我地message少咗, 唔再搵對方咁多
所以成個中五我就中意咗第二個男仔
(而呢個男仔後來成為咗我嘅黑歷史, 果度唔講啦, 果啲可以同朋友講)
K呢段故我淨係敢同啲完全唔識我中學嘅人講....

雖然我地冇聯絡得咁密, 但間唔中一頭半個月我地都會message幾個咁..

佢成日話等我畢業

佢成日都話等我畢業, 到我grad 果陣就帶我去旅行
結果由15歲講到我18歲 再講到我21歲
我地都冇去過 其實我都當係寒暄 講下姐...

咁中五時我中意咗果個男仔, 佢傷害我好多
但我好中意佢, 結果中六畢業之後就一齊咗

咁當刻我好中意個男仔, 咁都同咗果個男嘅一齊
咁我又點會理K咁多, 話知佢, 佢都話知我啦

咁大家都有出來食飯嘅, 但就三人行囉...
佢, 我, 同埋L

中六grad咗一直都有約見面, 大約每半年出來一次
K都有再係我地果間中學度教書
每次見面都會問我分手未...我話未, 佢就問我幾時結婚,
哈哈, 你問我, 我問邊個?

咁果陣有男朋友, 我都放下咗我同佢之前嘅所有野,
所以佢同L 好似親密咗 我都冇咩出聲
況且我可以講啲咩? 但呢一次, 我真係嬬
回望番, 我諗我應該係呷醋掛?

難得咁耐出來食飯, 果陣係2016年年頭, 我同果陣嘅男朋友一齊咗大約一年
K同L約好咗食飯 順便叫我埋出來食咁...
我新界西parttime收6點鐘 佢兩條友下晝出去九龍唔知一齊報咗個咩course去交報名費...
叫我放工出去旺角搵佢地...
我冇理 直接吊啦.... 傻_咗? 兩個得閒嘅要我仆住出九龍搵你地食飯? 咩玩法?

所以結果佢地都係交完費返返入來屯門同我食飯....
食咩唔講喇. 反正冇咩特別
我講呢單野出來, 如果K同L本人睇到呢個故, 一定知我係邊個.....
L本人估到就仆街了.....知道晒我嘅秘密....anyway..

約我搭半, 去到屯市唔見人..... 我等到搭八, 都唔見人
whatsapp佢地冇人應..心諗..你兩條友拍拖就咪_約埋我....
搵我出來等位??? 黑人問號?????
後來K應機, 我問佢地係邊, 佢搭我"黃金"

係人都知深水埗果個黃金中心先叫黃金....我心諗, 約我搭半, 你搭八同我係深水埗???????
你兩個拍拖就真係唔好搵我出來...
後尾佢打多兩個字 "海岸", 我仲嬬

心諗, 仆你地個街, 兩個一早番到屯門, 但因為我地約得晏, 所以兩個自己去黃金海岸hea.

我係whatsapp group講晒我早到咗, 一個人, 話我收6點好快就到
放工會好餓, 你兩條友, 夜媽媽去黃金海岸做咩

end up 來到, 我準備開口話佢地, K就先開口,
講晒我最想罵佢地嘅野出來.... 佢話佢估到晒我啲衰野七七七咁... 佢仲係度解釋話佢地係搭巴士
架巴士行屯門公路 經黃金海岸返黎

雖然果陣我有男朋友, 但唔知點解佢地咁close我又好似好唔中意咁
grad咗之後每次同佢見完面, 之後果幾日都若有所失咁
總係要精神恍惚幾日咁....
但2016年年頭我對我果陣個男朋友好死心塌地...
所以都叫自己, 唔好諗太多就算,
況且果陣L都係單身, 我以為佢地會係埋一齊.

那年快將30

2016年年尾, 大學有個男仔追緊我, 我亦對果個男仔有少少好感
而當時嘅男朋友比我係背後搵到佢做過幾多傷我嘅事
都打算同果個男仔分手
果個男嘅, 原來同我一齊嘅年幾裡面, 一直都同一個女仔keep住message
仲要成日互相send j圖, 大家字裡行間極曖昧, 仲要比我發現佢拎果個女仔嘅相打飛機....
個男又成日係其他人面前扮可憐咁, 心諗, 吊咗抹黑我!!!
anyway, 果個男嘅 我都諗住係適當時幾飛咗佢....所以我就真係同佢分手
總之之後又一場羅生門事件....

平時K都好少主動搵我, 係2016年暑假我去左北京成個月,
好多人都message我問我去咗邊去咁耐..咁佢就係其中一個
其餘時間佢都好少會搵我..

但係2016年11月18日嘅夜晚, K突然之間message我,
心諗都咁夜, 又咁耐冇搵大家, 做咩無啦啦message我
佢打咗好多好多野比我, 又叫我陪佢.
心諗, 做咩無啦啦提起4年前嘅野, 果陣我地點message法七七七都已經係以前
但佢講講下, 我先記得起果日係佢生日....

事實上, 佢果晚講嘅野真係令我困擾咗幾日, 好似有一兩個星期....
我諗下我係佢心目中到底算係咩,
我諗下到底佢當我係咩, 佢係搵我攝?
定係佢真係有中意過我?
咁多年來佢都有拍拖, 係等我? 定係巧合? 定係佢有過幾多段情我都唔知?

因為佢, 因為大學追緊我嘅男仔, 令到我把心一橫飛咗果陣果個對我唔好嘅男朋友.....

我冇記錯, 11月尾我同L都有搵佢食飯, 當係同佢食生日飯
果陣我都有比佢知我要同果陣嘅男朋友分手 當係放下風聲 又探下佢口風
果陣佢仲話, 你真係分先話我知啦, 你地啲後生呢頭話分又話係番埋一齊...
我就同佢講, 我心意已決 條友我分硬

咁佢就話, 咁你終於可以同我去旅行啦?
我心裡面始終覺得一男一女去玩好似唔係咁好
所以成日都話, 要等埋L草夠錢嗰七七七咁
就係咁, 我成日都用L耍走咗佢
況且, 我果陣都係中意大學果個男仔多過佢嘅....
但如果果陣佢追我嘅, 咁佢都係同大學個男仔公平競爭姐
大家都成年人, 佢又唔再係學校嘅老師, 況且佢又冇教過我, 唔算係我老師咩
如果佢當年加入呢場爭奪戰, 以佢嘅條件, 我同佢之間嘅感情, 關係同回憶
我會判K勝出啲

但我放晒聲氣, 佢都冇咩表示, 咁大學個男仔日日返學都見
近水樓台先得月係基本啦
咁所以, 我依家真係同緊大學果個男仔一齊咗...

兩年冇見

自從2016年年尾果次,我地就冇再聯絡,佢知道我同咗大學個男仔一齊之後
佢連平時半年一次嘅whatsapp都冇基本上我地都冇再搵大家
加上我同中學果個男仔分手之後,L好似變到唔識我咁,
連我生日都唔記得喇....咁K都冇再同我講生日快樂啦,因為我都冇同佢講...
但2017年,K生日嘅時候,其實我記得,但我諗,我依家都有個好好嘅男朋友啦
無謂騷擾人啫,佢中意我嘅,我搵佢又好似比個假希望佢咁,
佢唔中意我嘅,咁見唔見都冇所謂啦,或者佢已經有個好好嘅女朋友,可能係我唔知姐...
反正佢自己生日都冇奇奇怪怪咁message我喇,算啦~即使我記得佢生日,想講句生日快樂,
都係唔講算了

直到2018年3月,我搵佢,唔好諗多咗,唔關感情事
我搵佢係問機票姐,我亦同時發覺,我搵佢嘅時候
心情輕鬆咗好多,唔會再覺得有啲咩咁,所以我以為冇事

佢覆message依家都好hea,全部都單字,是非題
但call佢問野佢又即刻接電話,語氣都正常·大家嘅對話好似返返去以前熟悉嘅感覺咁
(講起call,以前中四都有同佢煲過幾次電話粥,我地都好似試過morning call過大家)

我Witty終於草夠錢喇暑假去歐洲喇 香港來回歐洲嘅機票都係佢幫我訂嘅
咁我見佢咁好幫我,咪出來食下飯囉,又咁耐冇見.

事隔多年,我今次見到佢,個心怦怦跳,唔知點解.我真係唔知點解
大家咁耐冇見,咪咩都傾下囉,照我地慣例,避談感情事
但字裡行間自己探聽下對方嘅感情狀況啦
今次見面大家咩都講,我連兩年前佢同L去黃金,我有幾髒,以為佢地拍拖都話埋比佢地知.
佢又照慣例問 問我幾時結婚,今次冇問我幾時分手.可能佢知道我今次同呢個男嘅係好認真.但我承認
我心裡面仲有佢 所以我就答,人地肯娶我先算啦.

可能大家真係太耐冇聯絡,我連佢轉過工我都唔知
開始識到有咁上下年資,佢又係度講舊時,又係度數我地識咗幾多年,數數下都6,7年
數數下佢又單身咗7年,呢7年佢都係返工旅行,返工旅行
咁佢有冇啲咩其他野我就唔知啦

我問佢,你覺得你呢種生活仲會過幾耐.
佢話,唔知架,但應該一直都唔會變.
我問點解,佢就話,依家冇咩唔好吖.
我問佢,你會唔會50歲走去娶個女人學人生仔架?
佢話,到時可能係你呢,到時變棄婦

我聽到呢句,笑咗一笑,同佢講,你咁黑心成日想我散,仲要咀咒我變棄婦....
我心諗,其實要等一個人,唔洗等到佢變棄婦架....
只要你早啲同我講...唔好等我嫁咗先講
有啲野恨錯離翻啊...

如果你係純粹講笑嘅, 我希望你唔好拎呢啲野來開玩笑
因為我認真架...

錯的時間對的人

自從3月果餐飯之後,我心癢癢咗成個月...

(所以我先會將我地嘅回憶寫成故事)

我幻想,如果我依家個男朋友向我求婚,我點好?

我好清楚,我心入面仲有佢...或者我會say no?

但我會問自己,你知道K心入面諗咩? 如果佢一直都只係搵你搵. 我只不過係錯用情
為左佢放棄一個對自己咁好嘅人, 值得嗎?

咁多年 K有冇為過我而停過一步?

唔知係咪K自己都有啲野, 自從果餐飯之後, 佢好多時候都已讀不回或者不讀不回

雖然之前都唔係成日whatsapp 但係我次次搵親佢,

就算係無聊野佢都會覆

但依家唔係啲生死攸關嘅野, 佢都唔會覆我...

係中學, 我有咩朋友, 連最親嘅果群朋友都背叛我了

與我中學時代有所關連嘅回憶同人都漸漸係我嘅生命裡面消失得無影無踪

依家係咪連你都要消失喇?

那年15, 你24

這年21, 你30

如果一切可以重來, 你會唔會選擇同我講

我地之間嘅距離唔係年紀

係時間...

回憶歸回憶

我會學會活在當下

那些歌

兩年前我掉晒所有日記同歌詞...都係希望自己可以將果段記憶忘記得一乾二淨
可惜, 要記起的, 始終要記起....
六年後重寫他填過的詞
今年的我, 明白他那刻的情懷

或者每個人, 都會分心。都會, 心癢。

知 我未算最愛的一個 情人
如何忘掉他 想得到我嗎 懇請你坦白
准 我代你放縱拋開了自由
為何還著緊 同床上那人 無謂做替身

回憶飛滿天 道別了不再連線
怕望見 你眼內情感爭奪戰
痛心傷心真心我都全呈獻
時限到了 你我會心變

時光早變遷 動盪我心 性情變
再遇見 你我內情一早奉獻
也許孤單芳心 遠方能重建
年度最愛看你我苦戰 全給我欺騙

想 抱住你細語一千遍 仍然
難逃避氣氛 肌膚都敏感 身體也追問
把 這段愛完全給洗去 未能
來成就某君 明明是我笨 謠傳極勇敢

回憶飛滿天 道別了不再連線
怕望見 你眼內情感爭奪戰
痛心傷心真心我都全呈獻
時限到了 你我會心變

時光早變遷 動盪我心 性情變
再遇見 你我內情一早奉獻
也許孤單芳心 遠方能重建
年度最愛看你我苦戰 全給你欺騙

無須想太多 妒忌妄想會難過
證實過 那誘惑 幻想侵襲
我這天親手把一切都全埋葬
沿路過客 愛我也憎我

來高歌我歌 熱淚也許會流過
你問我 這結局是否演繹錯

至少 即使心慌 你都來陪我
平淡看你我擦出花火 來把心割破

(待續...)